

Kuldusaxa zaldakuetshi kalta

Zuñgajienapanaldiamak

Meja ai kalta gauwane: Pábulduki Duwe Jesúja ají múldigaba guaxal gaxaneja jalde kaltaki gauwane. Aldéñki kuñbuldu Aldumaxa kalseldi izhoshi zhinik jalde gauwane ajañguxa. Akldé Pábuldu shaldaga miñkualdaldiamake “Aldumaxa zaldakuetshi kalta zuñgajienapanaldiamak” gaune tuakue.

Mekuetshi kalta gauwane: Pábulduja Duwe Jesús ipanane kuñbuldu Kuldusaxa ishjuizhaldekakue jalde kalta kakuzgauwane. Kuldusaki Asia baxega nuka. Eñguiñki akldé juldiú saná naldagáldekue zhekueñka. Pábulduja kuñbuldu Epesuxa Duwe shalda guagatogotshaga, ezua sigí Epapalda Duwe ipaná guñguenik Pábulduja akldé akldéñga Duwe shalda shaxaldiyane (1.7-8; Ajsh 19.10). Nalguák Pábulduja naldi Duwe shalda Kuldusaxa kakbeyazháne naldatshak, Epapalda exa zalda (4.12) nalguakna Duwe shalda kakbeyatshak namak ajañgui, iyapaná.

Jinak ai kalta gauwane: Epapaldajañki Kuldusaxa zaldakue Duwe zuñnekuane shalda namak shi kaxaldiyane nalgué, anuñka naldagálde shizhixakue naldagálde shi kaxalldiyaldiamak Kuldusaxa aldé. Guatshake Epapaldaki Pábuldu kalseldi izhogualdi tual neyatshak, naldagálde shizhixakue shalda akbeyá. Ekí nukañguakna Pábulduja Kuldusaxa zaldakue naldagálde ne jian kakzukuazhaldiamak, mokue namakldega ajañgualldiamak jalde kalta kagakauwane.

Ji, ji shalda guashi jalde kalta gaune:

1. Kasak misha ji shalda kakbene (1.1-2)
2. Kuldusaxa zaldakue Jatek kakbeñka (1.3-14)

3. Duwe Jesú za akaldak akaldak akzé izhuka (1.15-23)
4. Pábulduja Duwe ipananekue kaxazauñka (1.24-2.7)
5. Duwe Jesú za abisajañ zʉnakukshixa (2.8-23)
6. Duwe Jesú ipananekueki mitsabé izhogakue (3.1-4.6)
7. Aldiwe kakkbene (4.7-18)

Pábulduja Kuldusaxa zaldakuek kalta kakuzgaune

¹ Naski Pábuldu Saldiñga netshi Jateja jañguamak Asukuá Duwe Jesú Zʉnekualkajañki ají múldigaba guaxal nakaxanek kalta miñkuzgauwatokuge. Amak miñgakuwatoxaldatshak, Timuteyu, Duwe Jesúk zhinik nauwikaja nekldeja ekíga mimajañguxá ni mimakuák. ² Maiñ Kuldusaxa zalda Duwek zhinik nauwikajakue kalta miñkuzgauwatokugeki, Duwe Jesúja ají giemi mimaldekshane, ek za abá naldakí agapa mineñkakue.

Saldiñga netshi Jate Nauwijatega atemajañ éegaba guañ mimajañgui, muldetua aldunaxa señgaba miñzukui shi mimezhokshí.

Kuldusaxa zaldakue Jatek kakbeñka

³ Guatshak nasʉñki Saldiñga netshi Jate nauwijí Sáñkalda Duwe Jesútshi Ajatek kabiñmeyauxa, maiñ shalda “zeñ nzhakldék” kakbeñka. ⁴ Jinake naldakí. Maiñ Duwe Jesú Zʉnekualka alduna mishixa, saldiñga aldéñ ipananekue muldetua izhgajañgui mizhekue nukáñkalde nak. ⁵ Sakí zhinik ekí mizhekue naldakí. Maiñ Duwe Jesú zʉnekuane shalda múldigaba namaklde minukatshak, e ipanañkaldekuañki Jateja jékaldaxa janshizhe zʉñkatshaldixa[☆] janazʉñgaktune nukamine.

☆ 1:5 1.5 1Pe 1.4

Ekí minukajéñ zhinik na, “Jateja ekíga naxatshaldixa shakldá” jañgui jiaktuwi mizhekue nak.

⁶ Akze, Duwe zñekuane shalda saldiñga kagi nahauxa ashekuekuek kagabeyatogamakga, maiñ jiaga miñgabene. Kasak ekí Duwe shalda minukatshak, Jateja éegaba guañ mimajañguxá miñgajienatshak namak jañgui mipangueni zhinik na, Jateja mimajañguamak abisajañ izhogapanamine. Ekibeñga saldiñga Duwe ipanane kagi nahauxa ashekuekue jiaga akldé akldéñga Jateja kajañguamak izhogapananekue. ⁷ Ai múldigaba Duwe zñekuane shaldaki, Epapalda kizhgajañguxaja miñmeyanane. Aldéñki nasñ nañga Duwe Jesú abá naldakí axazauwi izhoshi, maiñ miñgauneshi izhuka.☆

⁸ Aldéñki exa zhinik jai nagatshak Duwe ipanaminekuañgaba Jatetshi Aldunaja sakí ajañgui mimezhokshatuka ni zñmémé.

⁹ Ekí maiñ shalda kaldukatshak zhinik na, abá naldakí Jatek ekí mimakbeyañkalduka: Jateja aldéñ shalda muldetua miñgajieñgui, miñwashekuéñ zhinik na, mimajañguauxa muldetua miñwashekualdiamak.

¹⁰ Ekíki maiñ nauwijí Sáñkaldatshi nekbinekuañki mitsabé izhogakue miñgatsauxabé zhekualdi na, saldiñga miyatshauxa Duwek akldunamak mizhekualdaldiamak. Ekíga na, axautshikuek saldiñga nalda janshizhe kaxatshalga mizhekualdaldiamak, Nauwijate akldé akldéñga “me ne” miñwasheshi, miyaxabaldexaldiamak mimakbeji kizhuka. ¹¹ Ekíga na, Nauwijate za guagasá atemajañ kama axaldé izhogakna, aldunaxa kama mimezhokshaldiamak mimakbeji kizhuka. Ekíki jibañ tuabinogéñ jiaga abá naldakí, egaba abeti mizhekualdaldiamak. Ekíga, zeñ miñneshi ¹² Jatek “zeñ nzhakldék” akbeyal minoxaldiamak. Akze, aldéñki

☆ 1:7 1.7 Kls 4.12; Plm 23

ají nekaldekuañ jékaldaxa muñshí zeñka bieni jana matshuwi janshizhe zũñkatshaldixa janazũñgaktune nakna, ajíkue mimaldekshanéñ zhinik ajíkuañki ipanakue zũñgatsahamakga mipanaldixakue.

¹³ Guatshak axaňgaki jisé za zũñsaneka tuañ zũnezguane kizhoguakna, Jateja jisék zũnebesanshatshak, Asukuá Duwe Jesú izhgajaňguxa niñkauwañki zũñsanekshapanane. ¹⁴ Akze, Duweki [shuigatshak abi akzuldi] sha katshixa zũnesabiyatshakna Ajateki jisék zũnebesanshi, sha katshixa zũñkabetixa nakldá.✠

Duwe Jesú za akaldak, akaldak akzé

¹⁵ Guatshak Saldiňga netshi Jateki ubak naldi tuazhá-nazũnaka naldatshak, Asukuá Duwe Jesúke aldéñ agat-sauxabé izhogakna sakí agatsé zũnatuñshixa. Akze, Duweki saldiňga jika na nahauxa gauwanekue guashiñki zhaxaňga zalda, ekue zhakaldak akzé, kaksaneka niuwi aksuikue nakldá. ¹⁶ Akze, Jateja saldiňga jika na nahauxa Asukuák ga gauwanane. Ek ga saldiňga jika kagik zaldakue, jékaldaxa zaldakue jiaga gauwanane. Amak gauwatshak ubak tunazũnakakue, tuazhánazũnakakue jiaga gauwanane. Ekí gauwatshak alduna akldé akzekue, saldiňga sanék gua niuwi axaldekue, sakígaba sanekakue, Jateja guaklde uldeňkakue jiaga gauwanane. Akze, Jateja Asukuá Duwe Jesúk ga saldiňga gauwanane. Ekíki saldiňgaja Asukuá za akaldak akaldak akzamakga agazukualdiamak. ¹⁷ Duweki ni ji naldakí nalgueňga jiaga, aldéñgaba izhoshi na, saldiňga jika na nahauxa nogakuauxabé nalshi naldatuka nakldá.✠ ¹⁸ Ekíga na, abuá sáñkaldaja aksanegamak Duwe Jesúki nauwíj Sáñkalda

✠ 1:14 1.13-14 Ep 1.7; 6.12 ✠ 1:17 1.15-17 Jñ 1.1-3; Eb 1.2-3

aldéñ ipanañkaldekuañki ají abuá zũñsaneka.✠ Aldéñ za na ajíkuañ abisajañ zũnezhokshixa, aldéñga na shuigueni kasaklde mokue shuigazhíta izhgate.✠ Ekíki saldiñga na nahauxa zhakaldak akzé izhoxaldiamak. ¹⁹ Akze, Saldiñga netshi Jateja Asukuák za na aldéñ agatsauxa ne izhoxaldixa izhgakuxa guane. ²⁰ Ekíga na, saldiñga jika gauwane na nahauxa, alnobaxa zaldakue, kagik zaldakue jiaga, Asukuák ga aldéñ na mokue ishkabakualdixa izhgakuxane. Akze, Jateja Asukuá abi akzuldi kaldixa axaldi shuanéñ zhinik na saldiñga ishkabakui, aldéñ na señgaba zhe noxaldiamak izhgakuxane nakldá.✠

²¹ Maiñ axaňgaki Jatek agajué zhekualdabinoguéñ sha jaňgui, kutám atshalga mizhekualguakna, aldunaldiñki Jate miňguldiñka namine naldashá. ²² Ekí mizhekualdatshak jiaga, kaigaki Jateja Asukuá mimitsaldí abuák shuixal gaxanéñ zhinik na, aldéñ na mimeshkaakuane. Ekíki niuwizhíne aldéñ nugeñka mimauldeyatshak, janshizhe, ni meja miňgatsé ne mimakuagakí, sha atshabíne jana mimatualdiamak. ²³ Naldatshak ekí mimatualdiamake, abá naldakí Duwe Jesú minkuanamak alduna ishál za nogakue. Akze, ni nauwa ijuldú naldakí, aldéñ za agapa neyal noshi na, aldéñ ipanañkaldekuañki niuwizhíne janshizhe zũñkatshaldixa zũñmenane “amak naxatshaldixaga shakldá” jaňgui, jiaktuakue. Guatshak Duwe Jesú zũnekuane shalda múldigaba nukaminega na káguba zhekuauxa kagabeyaldá na gu. Aiga na nas jiaga Jate axazauwi guakuge nakldá.

Pábulduja Duwe ipanankue kaxazauñka

²⁴ Guatshak miňgaunexaldikuamake guiyaba tuatokuge shaldaki zeñ nakldeka. Akze, Duwe Jesú guiyaba tunamak, aldéñ ipanankue ají abuá jana

✠ 1:18 1.18 Ep 1.22-23; 4.15 ✠ 1:18 1.18 Ajsh 26.23; Aux 1.5 ✠ 1:20 1.20 Ep 1.10; 2.16

nekue kagaunexaldikuamak, mitsá nají abuák guiyaba tuakue nezghakuxanauxa tuwi isugakuatokuge. ²⁵ Akze, saldiñga Duwe ipananekeue kaxazauwi izhokuge. Jinake ekí izhogakí. Saldiñga netshi Jateja ají múldigaba guagauxa miñmeyaldikuamak nezghakuxane nak.[☆]
²⁶ Aí múldigaba miñmeñkugéki, Jateja kasak zhinikga mu zñgisekuazháne ne, kaigaki ají giemikuañ ekí mu zñgisekuá guane. ²⁷ Akze, Jateja juldiú saná naldagáldekue jiaga zuxaita janshizhe na zeñ kajañgualdixa janakaktune mu zñgisekualdixa zñnajañguane. Aiga na, Asukuá Duwe Jesú mimijí aldunaldi izhogéñ zhinik, niuwizhíne jékaldaxa aldéñ na muñshí zeñka zñnezhokshaldixa zññmene, “amak naxatshaldixaga shakldá” jañgui za jimiyaktualdixa nakldá.

²⁸ Ekí nakna, Duwe Jesú zñnekuane shalda saldiñga sanákuek kakkbeañkaldogéñ, ek agapa neyakue kaksaneshi na, muldetua kishkué ga agatsaldi e shalda shi kaxaldiji kizhuka. Ekíki niuwizhíne saldiñga Duwe ipananekeue Jatek kakuldeyatshak aldunaxa auxabé guildek guanekue katualdiamak. ²⁹ Akze, amak kauldeyaldikuamak, Duwe Jesúja ají kama zuxaitsha ne nagegatshak aldunaxa kama nakukshi na, nagatsauxa kama ilshiji, jiba atshijiñgaba izhokuge nzha.

2

¹ Ekíga na, Duwe Jesú ipanaminekeue mimijí kuíbul-
 duxa zaldakue, Aldauldiseyaxa[☆] zaldakue, saldiñga nat-
 uazhánekue juizhiñga miñgaunexaldikuamak nagatsauxa
 kama ilshiji, jiba atshalga izhokuge miñkualdakue ni mi-
 majañgukú. ² Jinak ekí kama ilshakí. Saldiñga Duwe
 ipanaminekeue aldunaxa miñguildexaldiamak, zhualdixa

☆ 1:25 1.25 Ep 3.2,7-8 ☆ 2:1 2.1 Aux 3.14-22

ajañgui mizhekuéñ zhinik na askimimé mizhekualdaldiamak. Ekíga na, Jateja axańga mu zũngisekuazháne ne, kaigaki ai mu zũngisekuatukaki zeñ mimajañgui, muldetua auxaga mińgajienane mińkualdaldiamak. Jateja ekí mu zũngisekuatukaki Duwe Jesú zũnekualkaga nakldá. ³ Akze, Jate zũxaita ishkué nahauxa ne, saldińga nalda mikualdakue nahauxa ne, eńki akzegaba naldatshak Duwe Jesúja za na migajieńguaka nakldá.

⁴ Guatshak ezuakueki naldagálde nuxa jian mińgazukualdiamak múldigaba akzé ga agatsaldi mińgabeyatshak mimeyajuldukshazháldiamak jańgui na ekí mińmeńkú. ⁵ Naski maiń na izhogakí naldaldatshak jiaga, aldunake maiń nańga izhoshi, minjani ni izhokú. Akna, naldakuauxabe zhekualdi, Duwek abá naldakí alduna ishál mizhekue minakualdatshakna zeñ nakldeshi ni izhokú.

Duwe za abisajań zũnakukshixa

⁶ Akna Duwe Jesú shalda mińgabeyatshak namak jańgui aldéńki mimijí Sáńkalda ipanaminamak, e ipananeke mitsabé izhogakue nake, amak izhoxalga minoxaldí. ⁷ Ekí izhoshi na, kaldi guildexaldiamake shijualda juit zeńka jieńguamakbe, mimijí alduna Duwek muldetua jieńgui, alduna ishiji mińgualdí. Akze, Duwe Jesú alduna ishakue shi mińkaldiyanane akldé akldéńga alduna ishálga minoxaldí. Ekí noshi na, mińgatsauxa Jatek “zeń nzhakldék” akbeyalga za mizhekualdaldí.

⁸ Guatshak ezuakuejańki naldagálde nuxa namak mimajańgushaldiamak múldigababata, kagik zalda mikldexa za shi mińkaldixa. Ekí shi mińkaldiji na, kauwibamakuexa zhinik akuashi aldagatuka, jai kagike mielde atshá makuatshak jika naldakuauxabé naldaldiamake atsha za shi mińkaldixa. Ekueki Duwe Jesú zũnekuane

shalda shi miñkaldiyazhánamak za shi miñkaldixa nak, jian miñzukuazháldiamak muldetua numañ miyatualdí.

⁹ Akze, Duwe Jesú ixagabaldekldeki Saldiñga netshi Jate muldetua agatsauxa ek izhuka. ¹⁰ Ekíga na, maiñ Duwe mipanéñ zhinik na aldéñga aldunaxa ni ji jue naldakí, miñgajuezhauxa mimezhokshixa. Akze, Duwe za na Saldiñga netshi Sáñkalda izhogakna, saldiñga sanék gua niuwi axaldekue, sakígaba sanekakue kaksaneka nakldá.

¹¹ Guatshak juldiú sanákueki nauwa abeñguamak káguba nuxa mimabeñguazháne naldatshak, Duwe Jesú mipanatshakna, aldéñ naldiñga aldunaxa mimabeñguá zhuxañga sha atshindana miñzeka miñgajuekuá guane.

¹² Akze, Duwe namak jañguamine atualdiamak nik mijaukshatshake, Duwe shuane abegatshaga e nañga mimabexá guane zhuxañga miné.* Ekíga na, Jateja ají kamak Asukuá shuigueni izhgaldakshane namak jañguaminéñ zhinik, aldéñ Asukuá izhgaldakshanamakga maiñ aldunake abisajañ mimakukshane.✠

¹³ Guatshak maiñ juldiú saná naldabínekue Duwe ipanagá minogueñga sha atshiji za zhekualdabinogueñ, aldunaldiñki shuamine jana namine. Atshak Duweki sha atshindana miñzeka miñgajuekuagá nogueñki, ai za miñsaneka nane. Ekí mizhekualgué jiaga, Duwe mipanatshakga, Saldiñga netshi Jateja Asukuá shuigueni izhgaldakshanamakga, aldunak abisajañ mimakukshá guane. Aldéñga sha atshañkaldauxaki zñkabetá guane.✠

¹⁴ Ekíga na, sakígaba sha atshañkaldéñ zhinik shaldá zñduka xalte nalgué jiaga, nuk uba isañguá. Akze, Asukuá Duwe Jesú nauwitsaldí kaldixa axaldi

* 2:12 2.12 Ekí guagatshake ezua shuigatshak sha atshindana akzekaja ak-sanegaksá guamakbé, sha atshindana zñzeka zññsanegaksá guxa.

✠ 2:12 2.12 Alm 6.4 ✠ 2:13 2.13 Ep 2.1-5

shuigatshaga na, shaldá zundogueñka auxaga zunesabiji, uba isañguatshakna shaldá zundogaksá guane.✠
 15 Atshaga na, saldiñga shane sanék gua niuwi axaldekue, alduna shanekue jiaga nuk kama ikugatshakna, Asukuá kaldixa axaldi shuanéñ zhinik kagubiyane saldiñgak katuñshá guane nakldá.

16 Ekí nakna, ji miñgaxák zhinik, azhi ji mitukak zhinik, azhi ji ldiuwañki ji atshakue, saxa abisa nogéñ ji atshakue ajañguéñ atshabíneñ zhinik, azhi izhgasekué ldiuwañ ji atshaminéñ zhinik miñgatsaldi ne miñgabeyatshak kaxaldukabináldi.✠ 17 Jinake naldakí. Nuñgáki abuák aksaja neyamak, Jateja sakí zañkatshaldixa zñnatuñshaldiamak na guiyaba misha zñngenane nak. Ne namak zañkatshixaki Zñnekualka Duwe Jesúga nakldá.✠

18 Akna ezuakuejañki kauwizhéñ jana atshakí miné shalda miñgatsaldi ne miñgabeyatshak kaxaldukabináldi. Akze, ekueki aguañ zhikzukuane ga abeldashi na, Jateja guaklde uldeñkakue akldé agazukuxakue. Ekuejañki aldunaldi Jateja jika katuñshazháne ne jiaga katuñshane akuashi na shi miñkaldiyaka niuwi kaxaldé akuaka. Ne kauwizhéñki ji shalda sekuazhikshakue kaxaldaldakí jiaga, axaldáñ jañgui janagatune shalda nuxa zñxaita sekuazhigashixakue. 19 Ekueki Duwe Jesú shalda namaklde jañguaksá, shizhiyaksá guanéñ zhinik na ek agajuezhá guanekue. Akze, Duweki nauwijí Sáñkalda, aldéñ ipañañkaldekuañki ají abuákuañ kaldé. Akna abuá agatsauxa sáñkaldaja jiba axatshaldiamak aksanegamakbeñga, aldéñ Jateja aldunaxa guildegakue zñnajañguamak askuí zñnaldokshi, muldetua guild-

✠ 2:14 2.14 Ep 2.15 ✠ 2:16 2.16 Alm 14.1-6 ✠ 2:17 2.17 Eb 10.1

gakualdiamak zũñsaneshi izhuka nakldá.✠

²⁰ Guatshak Duwe Jesútshi nekbinekuañki e shuigatshaga maiñ jiaga shua guamine zhuxañga minakna,✠ jai kagike mielde atsha makuatshak jika naldakuauxabé naldaldiamake atsha miñgatsaldaksá guane.✠ Maiñki kagik zalda naldabiñsá guane ne, ¿jinak shi kagik zalda atshakue zañga miñsanegaka jañgualga minók?

²¹ Aikueki jiki kaugipa guasũñze, ji gakue izhguajasũñze, jiki juguasũñze miñgabeñka. ²² Ekí miñgabeñkakueki jiba agabeji saldinaldixakuega shalda miñgabeñka. Aiki kágubaja nuxa janaktunamak za miñgasanegatshak kaxaldukakue miñgatsaldakí. ²³ Ekí atsha guakuekue miñgabeji miñgasanegatshak, ishkué ga agatsaldi miñsanegakuamak jana miñgasaneka. Jinake naldakí. Kauwizheñ nuxa Jate sakí akldé akzukuakue janagatunamak agatsaldi atshakue miñgasaneshi na, axaldáñ aguáñ izhabakue, abuá jiaga guiyaba izhgatuñshakue miñgasaneka nak. Naldatshak ekí atsha guakuekue miñgabeñkaki sha atshindana miñzekak miyagubiyaldiamak ni nauwa miñgaunegakí naldashá.

3

Jékaldaxa zalda za jañguakue

¹ Guatshak Duwe Jesúki shuiguenik Jateja mokue izhgaldakshanamakga maiñ aldunake abisajañ mimakukshane nakna, jékaldaxa Duwe izhogeñka zaldakue za alduna ikaumine mizhekualdaldí. Akze, Duweki Ajate, Saldiñga netshi Jatega sanegatogeñka jibatshaldi mual akldé akzeñka ité nakldók.✠ ² Akna jékaldaxa zalda za alduna mikauwaldí. Ne Jate jañguagáldekueja jai kagik

✠ 2:19 2.19 Ep 1.22-23; 4.16 ✠ 2:20 2.20 Alm 6.6-11; Ga 2.19 ✠ 2:20 2.20 Ga 4.3-5,9 ✠ 3:1 3.1 Sal 110.1; Mt 22.44; Eb 1.3

ji alduna ikauwamakga zúnake alduna ikauwabináldi.
³ Jinake ekí miñmeyakí. Duwe shuigatshaga e nañga shuamine zhuxañga minakna, sakí izhominaneki izhoxabiñsá guane. Ne kaigaki abisajañ kukamine nakna, aldunaldiñki Jate numañ mimatuwi Duwek mimabexane aldéñ nugeñka mimezhokshatogák.✠ ⁴ Akze, Duweja aldunak abisajañ mimakukshi, be mimaldokshatogák ek mizhuka.✠ Akna e mokue kagik nagatshak zuxaita muñshí zalda awatuatshak, maiñ jiaga ekíga mimawatualdixa nzha.

⁵ Ekí nakna maiñki shuane sha atshaksá guamakbé, kagik zaldakue ajanashamak sha atshá jiúñgulde nuk masha miñgualdí. Akna, alduna nusagatse za jañgua, misewá naldagálde na askuildek atsha, abua na atshá guasúñzamak atsha masha miñgualdí. Ekí atshaminaka mikldexa, sakígaba sha atshindana mikzexa ni nauwa jañguabináldi. Ni jikakue saldiñga mimijígaba naldakue jañguabináldi. Azhi ekí mijañgualdiák zúnake, jikakue niñkauwañki Jate zhakaldak akzukui mishkizhaxaldixa. ⁶ Akze, ekí agatsaldi sha atshakuekue ajanashalga aldogéñ zhinik na, Jateja kaxañ atemajañ guiyaba katuñshaldixa nakldá.✠

⁷ Axañga maiñ jiaga Jate amak axatshakí minogueñgaki, ekíga sha atshá jiúñgulde za atshál nominane naldashá. ⁸ Ne kaiga zúnake, saldiñga ekí jiaga sha atshá mashakue miñgatsé: Nusá mikzexa, zuxaitsha mit-saulda, káguba agisaldakue ijana, axautshi nalda aguaxa, zukuak guasúñzamak zukuaxa mashakue.✠ ⁹ Ataba atabañ naldagálde ishkazguaxa mashakue.✠ Jinake naldakí. Maiñ zhakuá nusagatse itshuimiñnegamak,

✠ 3:3 3.1-3 Alm 6.4-11; Kls 2.12-13 ✠ 3:4 3.4 Ga 2.20; Plp 1.21 ✠ 3:6
 3.6 Ep 2.3 ✠ 3:8 3.8 Ep 4.29,31 ✠ 3:9 3.9 Ep 4.22,25

axáñ sha atshiji mizhekue naneki izhoxabiñsá guamine nak. ¹⁰ Ne Duwe mipanatshake zhakuá abisa itshualdi guamiñnegamak abisajañ mimakukshane. Jate mimakaune ekí mimakukshatshakna akldé akldéñga aldéñ janamé mimezhokshatuka. Ekíki aldéñ “me ne” muldetua miñwasheklde miyaxabaldexaldiamak.✧ ¹¹ Amak abisajañ z~~u~~nakukshéñ zhinik na, mieldeki nauwisaná ne, azhi axautshi sanákue ne, mieldeki juldiú saná abeñguamak abeñguane, azhi mieldeki amak abeñguazháne tuakue naldasá. Ekíga na, mieldeki awaxani zalda azhi mieldeki sakí naldakue aks~~u~~ñze, mieldeki nashi axautshi jiba axatshixa, mieldeki sáñkalda tuakue naldasá. Guatshak akzé tuakueki Duwe Jesú Z~~u~~nekualka za akaldak akaldak akzé izhuka. Aldéñki saldiñga ipanañkaldekuañ nauwiji aldunaldi izhuka nakldá.

¹² Guatshak Saldiñga netshi Jate naldi mimezhgakuxane, ají giemi mimaldekshane, aldéñki matshuwi mimañguiñgaba izhogakna, ekí abisajañ izhogakue: Ataba atabañ zhinik guañ ajañgui, juañ zaldaba za ishkatshakue. Axautshikue mimizhakldé akzé kajañgui, kaxabetakue. Axautshi izhogakue agatsahamak ubañga izhogakí naldaldiák jiaga, abeti miñgualdí. ¹³ Ji zhikldunas~~u~~ñ mishkatshatshak abetiñga izhogakue. Azhi mit-sake ezua sha makualdiák, éegaba axabetakue. Akze, nauwiji Sáñkalda Duwe Jesú sha atshamine éegaba miñkabetá me guanamakga, maiñ zhinik jiaga ishketakue miñgatsaldashá.✧ ¹⁴ Amak izhoshi na, akldé akzeki maiñgabaga ataba atabañ zhinik ajañgui mizhekualdaldí. Amak ajañgui mizhekualdatshakna, auxaga askuiñgaba ishkalaldakuamak mizhekualdaldixa nzha.

¹⁵ Duwe Jesú za aldunaxa señgaba miñzukui mimezhok-

✧ 3:10 3.10 Gn 1.26; 2Kt 5.17; Ep 2.10 ✧ 3:13 3.12-13 Ep 4.2,32

shixa nakna, ai señgaba mikzukuakue zañga miñgatsauxa, miyatshauxa miñsanegakue itshani miñgualdí. Akze, Duwe ipanamineke ají abua askimimé jana minakna, Jateja maiñgabaga señgaba zhe minoxaldiamak mimezhgakuxane. Ekí izhoshi na, Jatek “zeñ nzhakldék” akbeyalga za mizhekualdaldí. ¹⁶ Ekíga na, Duwe Jesúja sakí zũñmeyane, shi zũñkaldiyane akldé akldēnga shitiji, miñjuizha naldakí ai múldigaba za jañgui mizhekualdaldí. Ekí zhekualdi na, muldetua ishkué ga agatsaldi ataba atabañ zhinik Duwetshi múldigaba shi ishkdijji, sakí amak izhogakue zhiksaneshi, zhikbeyakue. Mimijí aldunaxa Jatek “zeñ nzhakldék” akbendana miñzegatoxaldiēñ, ají Aldunaja miñsanegamak, ají múldigaba na axazubeji, e za akldé akzamakga miyaxazbeyaldí. ¹⁷ Ekíga na, sakígaba atshamiñnegauxa, zukuakbiñnegauxa, nauwijí Sáñkalda Duwe Jesú naldashiñga agatsaldi za atshiji, zukuashi mizhekualdaldí. Amak zhekualdabi-noxaldiēñ nauwijí Sáñkalda Duwe Jesúk zhinik Saldiñga netshi Jate “zeñ nzhakldék” akbeyal mizhekualdaldí. ☆

Zhuajúk zaldagaba ishkdaldakue

¹⁸ Maiñ munzhi, nauwijí Sáñkalda Duwe Jesú ipanamineke izhogakue miñgatsahamak izhoshi na, “nasewá janshibeñga ni naksanexaldí” itshani miñgualdí. ¹⁹ Maiñ sigíkuañ, mimisewá muldetua izhgajañgui mizhekualdaldí. Ne, izhgajañguabíne jana agatsaldi axatshiji, kaxañ kaxazguaxabináldi. ☆

²⁰ Maiñ sukuakue, nauwijí Sáñkalda Duwe Jesúk akldunamak axatshiji na, mimijatekueja kaxatshakue miñsanegauxa amak miyaxatshaldí.*

☆ 3:17 3.16-17 Ep 5.19-20 ☆ 3:19 3.18-19 Ep 5.22-33; 1Pe 3.1-7 * 3:20 3.20 Ep 6.1. Jai múldigaba “sukuakue” guagatshake sukua ajaba, ajateja numañ tuwi agapa izhoxalga nuka guashi naldaka.

²¹ Maiñ jatekue, mimijí sukuakue nusá kakzukundana ajanashaksá zeñka kaxaldexabináldi. Azhi ekí miyaxaldexaldíak, jie kakzeshi ajanashazháka ne kakldexaldixa. ☆

²² Maiñ nashi, jai kagik mimijí sáñkalda miñkizhukakueja atshakue miñsanegauxa amak miyaxatshaldí. Aldéñ mimatuatogéñ za “janshibé atshixá tiuwi” mimajañgualdiamak amak axatshagábaki, nauwijí Sáñkalda Duwe Jesú axabeti, zhema miñkizhogéñ zhinik na, miñgatsauxa amak kaxatshakue itshani miñgualdí.

²³ Sakígaba miyatshatshak, “kágubak nuxa sha axazauwatokú” itshani atshagábaki, “nauwijí Sáñkalda Duwe Jesú sha axazauwi jiba axatshatokú” itshani, miñgatsauxa miyatshaldí. ²⁴ Akze, ai shalda nauwijí Sáñkaldaja bieni miñkauwi jana janshizhe miñkatshaldixa miñkué. Miñjuizhanagába, Duwe Jesú nauwijí Sáñkalda guana axazauwabinuka naldashá. ²⁵ Ekí ne miñkauwañki, mieldeki sha atshalga noxaldíak, Jateja guiyaba tuakue agatsamak tuñshaldixa. Jinake naldakí. Aldéñki mielde naldaldí, agatsaldi azhi agatsaldakí ne zhualduxa tuakuamak za tuñka nak. ☆

4

¹ Guatshak maiñ sáñkaldakue, mimijí nashikue mitsabé kaxatshiji, numañ katuakue miñgatsake auxabé miyaxatshaldí. Akze, maiñ jiaga jékaldaxa Saldiñga netshi Sáñkalda, mimijí Sáñkalda miñgiteñga nuka miñkualdashá. ☆

Guiyaba akldé kakkbene

² Guatshak abá naldakí Jate axazguaxal mizhekualdaldí. Ekí minoxaldiéñ uba zhikldeñshamine,

☆ 3:21 3.21 Ep 6.4 ☆ 3:25 3.22-25 Dt 10.17; Ep 6.5-9 ☆ 4:1 4.1 Ep 6.9

Jatek “zeñ nzhakldék” akbeyal mizhekualdaldí.✠

³ Amak axazguaxabinoxaldieñ, nasuñ shalda jiaga zʉnakbeji miñgualdí. Ekíki Jateja Asukuá Duwe Jesúk zʉnekualdaldixa mu zʉñgisekuane akldé guagakualdiamak, aldéñga juwí zʉñgakpeshi guxá jana matshuwi nekueja aldukandana kakzukualdiamak. Amak guakugé shalda na jai kalseldi* nabexane ni izhokú. ⁴ Naski kágubaja nukatogéñ Duwe shalda kagajienakldegamak agatsaldi, guagakue nagatsahamak guaxaldikuamak Jatek minakbeyaldí.✠

⁵ Maiñ Duwe ipanazhánekue na mizhekualdaldieñ, muldetua jañgua guamine kaxatshakue. Akze, mit-sakgaba kauwizhéñ na mizhekualdatshak ekíga miyat-shaldí.✠ ⁶ Akna, kauwizhéñ na dulda mizhikshatshak, múldigaba nukaté nokldana agatsaldi, janshagatse na za dulda kakshakue. Ekíki ji mijañguxá miñgaldukat-shak, ezuak ezuak kakiyokuakuamak kakiyokuakue aux-aga miñwashexaldiamak.

Aldiwe kakbene

⁷ Guatshak Tíkiku,✠ Duwek zhinik nauwikaja neklde kezhgajañguxa, jibake nas na askuiñga nauwiji Sáñkalda Duwe Jesú muldetua axazauwal za izhuka. Aldéñki exa neyatshak saldiñga nogatokugauxa miñmeyaldixa. ⁸ Akze, eñki sakí noxañkalduka auxaga miñmeyal, al-dunaxa jiaga mimakuiyakshaldiamak jañgui miñgakagato-kuge. ⁹ E nañga na, maiñ nañga agatsé Onésimu✠ jiaga miñgakaxaldikue. Eñki Duwe ipanane, ek muldetua agapa neñka, kezhgajañguxa. Kauwizhéñki sakí jai zegatogauxa miñmeyaldixa nzha.

✠ 4:2 4.2 Alm 12.12; Plp 4.6 * 4:3 4.3 Plp 1.16; Ep 3.1; 4.1 ✠ 4:4 4.3-4

Ep 6.19-20 ✠ 4:5 4.5 Ep 5.16 ✠ 4:7 4.7 Ajsh 20.4; 2Tm 4.12; Ep 6.21

✠ 4:9 4.9 Plm 10-12

¹⁰ Jai kalseldi nagapa izhuka, Aldistalkuja mimajañguxá miñmeyakue ni mimakuák. Malku, Belnabétshi akajaja ekíga miñmeyakue ni mimakuák. Eñki miñkabizhal neyaté mutualdiake, muldetua ipanakue miñmeyanugamak mipanaldí. ¹¹ Ezuañki Jesú axezhuka ne, Justu akuakaja jiaga mimajañguxá miñmeyakue ni mimakuák. E maigua nasaná juldiúkue za na, jai nas na kágubakue Jateja kaksanegaka ajañgualdiamak askuí jiba atshiji izhukakueki, muldetua aldunaxa nakuiyakshi izhukakue. ¹² Epapalda maiñ nañga agatsé, Duwe Jesú axazauwi izhukaja jiaga mimajañguxá miñmeyakue ni mimakuák. Aldéñki agatsauxa kama ilshiji, abá naldakí Jatek ekí mimakbeji izhuka: Maiñ aldunaxa guildeshi, Jateja izhogakue mimajañguamak miñwashegatshak, “ekí sha izhogakue na” jañgui, ijuldu naldakí amak za mizhekualdaldiamak. ¹³ Akze, aldéñki maiñ na, Aldauldiseyaxa zaldakue, Eldápuldixa zaldakue juizhi, minjani, miñgaunexaldiamak kama ilshijiñgaba izhuka miñmeyanaka ni tuñkú. ¹⁴ Alduka, méldiku kezhgajañguxa, Dema na, mima-jañguxá miñmeyakue ni mimakuák.

¹⁵ Duwe ipananekue Aldauldiseyaxa zaldakue, Nimpa, ajúk juizhaldekakue juizhi, nas kajañguge kakbeji miñgualdí. ¹⁶ Nas jalde kalta miñkuzgauwatokugeki, exa saldiñga minekuañ minukaldiamak miñkagazukuakshakue. Gualdini Duwe ipananekue, Aldauldiseyaxa juizhaldekakuek ekíga kaxagazukuakshaldiamak kakbeji, kakuzgauwa miñgualdí. Ekíga jiak, exa kalta kakuzgauwanuge niñkauwañki maiñ zukuakshi miñgualdí.

¹⁷ Alkipuk ekí miyakbeyaldí: “Duwe Jesúja jiba maxat-

☆ 4:10 4.10 Ajsh 12.12,25; 13.13; 15.37-39; 19.29; 27.2; Plm 24 ☆ 4:13
4.12-13 Kls 1.7; Plm 23 ☆ 4:14 4.14 2Tm 4.10-11; Plm 24

shaldixa mezhgakuxane auxaga matshaldí.”☆

¹⁸ Guatshak jalde kaltak “mimajañguge” miñmeji asuxake naxáuxaldak naldi miñgitsuñgualdikue.† Nas jai kalseldiñga izhogatokuge be nezhgisekui Jatek nakbeyal minoxaldí.

Saldiñga netshi Jate atemajañ éegaba guañ mima-jañgualga shi noshí. Ekíga shi naldí.

☆ 4:17 4.17 Plm 2 † 4:18 4.18 Pábuldu jalde kalta ají káuxaldak naldi gauwazhá, ezuak gaushane naldatshak múldigabaki ajíga.

Jatetshi múldigaba

Kogi: Jatetshi múldigaba New Testament

Copyright © 2015 Wycliffe Bible Translators, Inc.

Language: (Kogi)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 11 Feb 2021 from source files dated 10 Feb 2021

7c5b6db6-c9a4-56c8-a822-4345cd7bafc0